

ጳውሎስ ዲዎቲዮሳስ ፃፊዳ ናሞዓንሶ ኪታ ጋሳ ቆፋ

ጳውሎስ ዲዎቲዮሳስ ፃፊዳ ናሞዓንሶ ኪታይ፡ ጳውሎሳራ ኢሲፌ ኦፊሴሳኔ ጳውሎሳ ማታን ማዲያ ናዓቲላ ዲዎቲዮሳ ዘሪዳ ዘሪያ ኦይኪስ፡ ሄ ዘሪያ ኦይፌ ቆፋይ፡ «ጌንጫን ሚናናው ቤሱስ» ጌይሳ፡ ዲዎቲዮሱ ዘሬኔ ሚንጮሶ ቃላ ኤኪዳይ፡ ዬሱስ ኪሪስቶሳባ ቱማ ማርካታና ሜላ ዋንጌላ ቃላኔ ጋለዓ ጫቆ ቲሚርቲያ ሚንሱዲ ኦይካና ሜላኔ ሜቶይኔ ኢያይ ዳሪኮካ ታሚርሱኔ ዋንጌላ ሳባኩን ሚናና ሜላሳ፡፡

ዲዎቲዮሱ ሃዳ ኤያቲላ ፓላማፔ ሃካና ሜላ ዲማ ሚኖ ዘሪይ ኢያው ኢሜቲስ፡ ሄሳ ሜላ ኦዳይ ኣሳ ቆይሱሲፔ ኣቲን ኣይኮካ ማዳና፡፡

ሄ ኡባን ዲዎቲዮሱ ኣኬካናው ቤሲያባይ፡ ጳውሎሳ ሃናታኔ ኢያ ዲሳ ቆፋ ሄሲካ፡ ኢያ ኣማኑዋ፡ ኢያ ጌንጫ፡ ኢያ ሰቁዋ፡ ኢያ ዲንዳዓኔ ኢያ ጋኪዳ ሜቱዋ ለሚሶ ኦሱዲ ካላናይሳ፡፡ ጳውሎስ ሃ ኪታ ፃፊዳይ፡ ኢ ባ ዋላ ኦንጊዲ ሃይቆስ ጊጌቲዳ ዋዳና፡፡

2 ዲዎቲዮሳ ኪታ ኣይፌ ቆፋታ

- ጌሎ ቆፋ 1:1-2
- ዲዎቲዮሳስ ኢሜቲዳ ዘሪያ 1:3-2:13
- ዉርሴላ ዋዲያባ 2:14-4:5
- ጳውሎስ ሃኒዲ ዳዒያ ዲሳ 4:6-18
- ኩሻ ቆፋ 4:19-22

1 ያሳ ሸኔን፡ ዬሱስ ኪሪስቶሳን ቤንቲዳ ዳዖ ኡፋይሳ ማርካታናው ዬሱስ ኪሪስቶሳ ሃዋሬ ጊዲዳ ጳውሎሳፔ፡

2 ታ ዶሲያ ናዓ ዲዎቲዮሳስ ኪቲቲዳ ኪታ፡፡

ያሳ ኣዋፔኔ ኑ ጎዳ ኪሪስቶስ ዬሱሳፔ ኣጼ ከሃቲላይ፡ ማርቲላይኔ ሳርቲላይ ኔው ጊዶ፡፡

ዲዎቲዮሳስ ኢሜቲዳ ዘሪያ

3 ታኒ፡ ታ ዋሳን ቃማኔ ጋለስ ኔና ቆፓይስ፡ ታኒ ዋሲያ ዋዳ ታ ማይዛታ ያሳኔ ታኒ ሎዖ ካሃን ሃጋዚያ ያሳ ኔ ጊሾ ጋላታይስ፡፡

4 ታኒ ኔ ኣፋላ ቆፓይስ፤ ኔና ቤዓዳ ኡፋይታናው ዳር ላሞታይስ፡፡

1:2 ሃ.ኦ 16:1

5 ቃሲ ኔው ዳዒያ ቱማ አማኑዋ ኤራይሰ። ሄ አማኖይ ቤኒ ኔ ዋጋ አዬ ሎይዲኒኔ ኔ አዬ ኤወኒቂን ዳዒያ አማኑዋ ማለ።

6 ሄሳ ጊሾ፣ ታኒ ታ ኩሺያ ኔ ቦላ ዋሊዳ ዋዴ ያሳይ ኔው አሚዳ አሞታ ኔኒ ዛራ ኤሳና ማላ አኬኪሳይሰ።

7 አይሰ ጊኮ፣ ያሳይ ኩሰ ዋልቃ፣ ሲቆኔ ኑ ሁዔ ሃሪያ አያና አሚሰፔ አተን ያሻ አያና አሚቤና።

8 ሂዛ፣ ኑ ጎዳሰ ማርካታናው ዬላቶፓ፤ ቃሲ አያ ጊሾ ቃሺቲዳ ታናንካ ዬላቶፓ። ሺን ያሳይ ኔው አሚያ ዋልቃን ዋንጌላ ጊሾ ታራ ሜቶ ኤካ።

9 ያሳይ ባ ሺኔኒኔ ባ አጵ ኬሃቴላን ኑና አሺዲ፣ ባ ጌሻ ዳሬ አላናው ኑና ዶሪሰፔ አተን ኑኒ አሊዳ አሱዋ ጊሾ ጊዴና። ሃ አጵ ኬሃቴላ ኪሪሰቶሰ ዬሱሳ ባጋራ አላሜይ ሜዴታናፔ ሲንጤ ኩሰ አሚሰ።

10 ሃዒ ሃ አጵ ኬሃቴላይ ኑና አሺያ ኪሪሰቶሰ ዬሱሳ ዩሳን ቆንጨሰ። ኢ ሃይቆ ዋልቃ ጳይሲዲ፣ ዋንጌላ ባጋራ ጳዮና ዴዎ ኩሰ ቆንጨሲሰ።

11 ታኒ ዋንጌላ ሳባኬ፣ ሃዋሬኔ አሰታማሬ ጊዳና ማላ ያሳይ ታና ዶሪሰ።

12 ታኒ ሄሳ ጊሾ ሃ ሜቱዋ ኤካይሰ፤ ሺን ታ አማኔይ ኦኑኮ ኤሪያ ጊሾ ዬላቲኬ። ታው አሜቲዳ ሃዳራ ሄ ጋላሳይ ጋካናው ኢ ናጋናው ዳንዳዔይሳ ኤራይሰ።

13 ታኒ ኔና ታማርሲዳ ቱማ ቃላ ሌሚሶ አላ አይካዳ ኪሪሰቶሰ ዬሱሳ ባጋራ ኩባ ጊዲዳ አማኑዋኒኔ ሲቁዋን ዴዓ።

14 ኑ ጊዶን ዳዒያ ጌሻ አያና ዋልቃን ኔው አሜቲዳ ሎዎ ሃዳራ ናጋ።

15 ኢሲያ ቢታን ዳዒያ ኡባይ ታፔ ሃኪዳይሳ ኤራሳ፤ ኤንታ ጊዶን ፊጌሉሲኔ ሄርሞጌኔሲ ዴዎሶና።

16 አኔሰፎሪ ታና ዳር ዋዴ ሚንጼሊዳ ጊሾ ጎዳይ አያ ሶ አሳሰ ቃጴቶ። ታኒ ቃሾ ኬላን ዳዒያ ዋዴ ኢ ታናን ዬላቲቤና።

17 ሄሳ ቦላ ኢ ሮሜ ካታማ ዩዳ ዋዴ ታና ሚንጼ ኮዩዲ ዴሚሰ።

18 ወርሴላ ጋላሳን ጎዳይ አያው ቃጴታና ማላ ታኒ ጎዳ ዋሳይሰ። ኤፌሶና ካታማን ኢ ታና አይ ማላ ማዲዳኮ ኔ ሎይላ ኤራሳ።

2

ዩሱስ ኪሪስቶስን ሚና

- 1 ሂዛ፡ ታ ናዓው፡ ኪሪስቶስ ዩሱስን ዳዒያ ማርቴላን ሚና።
- 2 ዳር ማርካታ ሲንላን ታኒ ኔና ታማርሲዳ ተሚርቲያ፡ ሃራታ ታማርሳናው ዳንዳዒያ እማኔቲዳ አሳሰ ሃዳራ እማ።
- 3 ዩሱስ ኪሪስቶስን እማንሊያ ዋታዳሬ ጊዳዳ ታራ ሜቶ ኤካ።
- 4 ኦላ ዋታዳሬይ ባ ሃላቃ ኡፋይሳናው ጊጌቴሲፔ ኣቲን ሃራ ኦሶን ባና ፔሺና።
- 5 ሄሳዳካ፡ ጋዴ ዋዒያ ኦኒካ ቤሲያ ኦጌራ ጋዴቶና ኢዲኮ ዋይቶ ኤኬና።
- 6 ጎሻን ዳቡሪያ ጎሻንቾይ ባ ዳቡራ አይፊያፔ ሚያ ኮይሮ ኣሲ ጊዳናው ቤሴስ።
- 7 ኔ አኬካና ሜላ ጎዳይ ኔና ማዳና ጊሾ ታ ኔው ኦዲዳባ ኔ ዋዛናን ናጋ።
- 8 ታኒ ማርካቲያ ዋንጌላ ሜላ ሃይቆፔ ዳንዲዳ፡ ዳዊቲ ዜሬላ ጊዲዳ ዩሱስ ኪሪስቶስ ቆጋ።
- 9 ታኒ ዋንጌላ ኦዲያ ጊሾ ኢታባ ኦሊዳ አሳዳ፡ ቃሼታዳ ሜቶ ኤካሰ። ሺን ያሳ ቃላይ ቃሼቴና።
- 10 ሄሳ ጊሾ፡ ያሳይ ደሪዳ አሳቲ ኪሪስቶስ ዩሱስን ዳዒያ አቶቴላ ሜሪና ቦንቹዋራ ኤካና ሜላ ኤንታ ጊሾ ኡባባን ዋዩታይስ።
- 11 ሃይሳዳ ያጊያ ቱማ ቃሊ ዳዔስ፤
«ኦኒ ኢያራ ሃይቁዳባ ጊዲኮ፡
ኢያራ ኢሲፌ ዳዓና።
- 12 ኦኒ ጌንጨኮ፡
ኢያራ ኢሲፌ ካዋታና፡
ኦኒ ኢያ ካዲኮ፡
ኢ ኦና ካዳና።
- 13 ኦኒ እማኔቶና ኢዲኮ፡
ኢ እማኔቲዳይሳ ጊዲዲ ዳና።
አይስ ጊኮ፡ ኢ ባና
ካዳናው ዳንዳዔና» ያጌስ።

ሚና ኦሳንቾ

14 ኔኒ ኤንታ ሃይሳ አኬኪሳ፤ ኤንቲ ቃላታ ጋሶን ፓላሞና ሜላ፡ ጎዳ ሲንላን ኤንታ ዞራ። ሄሲ ሲዔይሳታ ቆይሴሲፔ ኣቲን አይኮካ ማዳና።

2:12 ማቶ 10:33፤ ሉቃ 12:9

15 ኔኒ ቱማ ቃላ ሱሬቴላን ታማርሴይሳኔ ዩላዮና ኦሳንቾ ጊዳዳ፣ ያሳይ ናሺያ ኦሳዳ፣ ኔናቴላ ኢያው ኢማናው ሚና።

16 ሺን ሃ ኦላሚያሰ ኢንጃቲያ ጎዖና ኦዳፔ ባቃታ። ሃሳ ማላ ኦዳይ ኦሴ ያሳፊ ሃሴሰ።

17 ሃሳ ማላ ኦዳይ ኦሳቴላ ሚዲጊያ ፓዖና ዋይዛዚሬ ማዲንላ ማላ። ሃሳ ማላ ኦዳ ኦዴቴይሳታ ጊዶሬ ሃሚኔዮሲኔ ፊሊዖሲ ዴዖሶና።

18 ሃ ኦሳቲ ቱማ ኦጊያ ኦጊዲ፣ «ሃይቁዳ ኦሳይ ሃይቆፔ ቤኒ ዴንዲዶሶና» ያጊዲ ጉላ ኦሳታ ኦማኑዋ ጳይሲዶሶና።

19 ጊዶሺን፣ ያሳይ ሚኖ ዛላ ሃዲዳ ጊሾ ቃዖናው ዳንዳዔና። ኢያ ቦላ፣ «ጎዳይ ባይሳታ ኤሬሰ። ጎዳ ሱንላ ዌጊያ ኦኒካ ኢታ ኦሶፔ ሃኮ» ያጊያ ቃላይ ያፊቲሰ።

20 ኢሲ ጊታ ኬላን ዋርቃሬ ዋይኮ ቢራፔ ኦሴቲዳ ሚሺታ ዓላላ ጊደናሺን ሚላሬ ዋይኮ ኡርቃሬ ኦሴቲዳ ሚሺቲካ ዴዖሶና። ሃሳታፔ ባጋቲ ቦንቾ ኦሶሰ፣ ቃሲ ባጋቲ ቶሼቲያ ኦሶሰ ፔዖሶና።

21 ሃሳ ጊሾ፣ ኦኒካ ኢታ ኡባ ኦጊኮኔ ባና ጌሺኮ፣ ቦንቾ ኦሶ ኦሊያ ሚሼ ጊዳና። ኤንታ ዴዖይ ጌሺኔ ጎዳ ኡፋይሲያባ፣ ቃሲ ኤንቲ ሎዖ ኦሶ ኡባ ኦላናው ዳንዳዔይሳታ ጊዳና።

22 ናዓቴላ ኢታ ኦሙዋፔ ባቃታ። ጌሻ ዋዛናን ጎዳ ዌጊያ ኦሳታራ ኢሲሬ፣ ዌሎቴላ፣ ኦማኑዋ፣ ሲቆኔ ሳርቴላ ካላ።

23 ሺን ኦሺ ማዴይሳ ኤራዳ ኤያቴላኔ ሃዳ ጊዲዳ ፓላማፔ ሃካ።

24 ጎዳ ኦሳንቾይ ኦሳ ኡባሰ ኬሃ፣ ሎዖ ታማርሴይሳኔ ዳንዳዓንቾ ጊዳናው ቤሴሲፔ ኦቲን ኦይታናው ቤሴና።

25 ኢ ባራ ኤቁቴይሳታ ኦሽኬቴላን ሴሬይሳ ጊዳናው ቤሴሰ። ኤንቲ ባንታ ናጋራፔ ሲሚዲ ቱማ ኤራናዳ ያሳይ ኦላኔኮ ኦኒ ኤሪ።

26 ኤንቲ ባንታ ዋዛናኮ ሲሚዲ ባ ሺኒያ ኦላና ማላ ኤንታ ኦይኪዳ ያላሄ ዌሃያፔ ኬሲ ኤካና።

3

ወርሴላ ጋላሳ ማላታታ

- 1 ወርሴላ ጋላሳን ኡንዔሊያ ዋዴይ ያናይሳ ኤራ።
- 2 ኦሳይ ባንታና ዶሴይሳታ፣ ሚሼ ሲቁይሳታ፣ ጨቁቴይሳታ፣ ኦቶሬይሳታ፣ ጨይይሳታ፣ ባንታና ዩሊዳይሳታሰ ኪቱቶናይሰታ፣ ጋላቶናይሰታ፣ ጌሻቴላ ባይናይሳታ፣

3 ሲቆይ ባይናይሳታ፣ ማርቴላ ኤርናይሳታ፣ ዚጊሬይሳታ፣ ባንታና ሃርናይሳታ፣ ቃጴይ ባይናይሳታ፣ ሎዎ ደሶናይሳታ፣

4 ሞርኬስ አሊ ኢሜይሳታ፣ ቆሬ ባይናይሳታ፣ ኦቶርን ሱጌቴይሳታ፣ ያሳፌ አሊዲ አሾ ኡፋይሳናው ደሴይሳታ ገደና።

5 ኤንቲ አማኒያ ዳናሶና፣ ኦቶርን አማኖ ዋልቃ ካደሶና፤ ኔኒ ሄሳ ሜላ አሳታ፣ ባቃታ።

6 ኤንታፌ ኢሶቲ ኢሶቲ አሳ ኮሌ ጌሊዲ ናጋራን ኦይኬቲዳይሳታ ኡማ ዳማ አሞን ሱጌቲያ ዳቡራንቾ ማጫሳታ ቦላ ጎዳቶሶና።

7 ሄ ማጫሳቲ ኡባ ዋዴ ታማርሶና፣ ሺን ቱማ ኤራናው ዳንዳዎኮና።

8 ያኔሲኔ ያምባሬሲ ሙሴራ ኤቄቲዳይሳዳ ሃ አሳቲ ጉጌይ ኦላናይሳታ ኦማኖን ኩንዲዳ አሳታ ገዲያ ገሾ ቱማራ ኤቄቶሶና።

9 ሺን ያኔሳኔ ያምባሬሳ ኤያቴላይ ቆንጪዳይሳዳ ኤንታ ኤያቴላይካ አሳ ኡባ ሲንላን ቆንጫና ገሾ ኤንታው ሃኔና።

ወርሴላ ዞሬ

10 ሺን ኔኒ ታ ቲሚርቲያ፣ ታ ዱሳ፣ ታ ቆፋ፣ ታ አማኑዋ፣ ታ ዳንዳዳ፣ ታ ሲቁዋ፣ ታ ጌንጫ፣

11 ታ ዬዴቴላኔ ታ ሜቱዋ ኤራሳ። አንዎኪያን፣ ኢቆኒዮኔን፣ ሊሰደራ ካታማታን ታና ጋኪዳባኔ ታኒ ዳንዳዲዳ ሜቱዋ ኤራሳ፤ ጎዳይ ታና ሄ ኡባፌ አሺሰ።

12 ኪሪሰቶስ ዬሱሳን ያሳ ኡፋይሲያ ዴዎ ዳናው ኮያ ኡባይ ጎዴታና።

13 ኢታ አሳቲኔ ባሌሌይሳቲ ባንታው ባሌቲሼኔ ሃራታ ባሌሊሼ ካሴ፣ ኢቲ ኢቲ ባና።

14 ሺን ኔ ታማሪዳ ቱማኒኔ ኔ አማኒዳ አማኑዋን ኤቃ። ኔ ኦዴፌ ታማሪዳኮ ኤራሳ።

15 ኔኒ ኔ ናባቴላፌ ደማዳ ኪሪሰቶስ ዬሱሳ አማናዳ አቶቴሌ ዴሚያ ጩንጫቴሌ አማናው ዳንዳዲያ ጌሻ ማፃፋታ ኤራዳሳ።

16 ጌሻ ማፃፋ ኡባይ ያሳፌ አሜቲዳ ቃላ። ሄ ማፃፋይ ቱማ ታማርሳናው፣ ባሊዳይሳታ ሴራናው፣ ሱሪሳናውኔ ያሎቴላ ዱሳሰ ኮሺያ ዞሬ አማናው ማዴሰ።

17 ያሳ አሲ ፖሎኔ ሎዎ ኦሶ ኡባ ኦላናው ገገዳይሳ ገደና ሜላ ማዴሰ።

4

1 ታኒ ኔና ፆሳ ሲንጻጸጸ፤ ካዎ ገዲዲ ሃራናው ቆንጨያ ዎዴ ፓፃታኔ ሃይቁዳይሳታ ፒርዳናው ዴዒያ ኪሪሰቶስ ዩሱሳ ሲንጻጸጸ ዘራይሰ።

2 ቃላ ኦዳ፤ ዎዴይ ኢንጃቲን ኢንጃቶና ኢዲን ሚናዳ ኦዳ። ዳር ዳንዳዒኔ ታማርሶን ኣሳ ዘራ፤ ሴራኔ ዴንጮ።

3 ኣሳይ ቱማ ቲሚርቲያ ሲዖና ኢዲያ ዎዴይ ያና። ኤንቲ ባንታ ኣሙዋ ካሊዲ፤ ባንታው ሲዓናው ኡፋይሲያሳ ኦዲያ ኣስታማሬታ ሺሾሶና።

4 ኤንቲ ቱማ ቲሚርቲያ ኣገዲ፤ ቱማ ገዶና ኦዳ ሲዓናው ባንታ ሃይላ ዛርሶና።

5 ሺን ኔኔ ኡባባን ኔና ሃራ። ሜቱዋ ዳንዳዳ። ዎንጌላ ማርካቴላ ኦሱዋ ኦላ። ኔው ኢሜቲዳ ፆሳ ኦሶ ኡባ ፖላ።

6 ታኒ ያርሺቲያ ዎዴይ ጋኪሰ፤ ሃ ኣላሚያ ኣጋዳ ቢያ ዎዴይ ማቲሰ።

7 ታኒ ሎዖ ኦላ ኦሌታሰ፤ ታ ጋዲያ ዎፃዳ ወርሳሰ፤ ኣማኑዋ ናጋሰ።

8 ሲንጻጸፊ ዲሎቴላ ካላቻይ * ታና ናጌሰ። ሄሳ ዲሎ ፒርዳ ፒርዲያ ጎዳይ ሄ ጋላሰ ታው ኢማና። ሄሳ ታ ፃላላሰ ገደናሺን ኢያ ቆንጨላ ኣሞቲያ ኡባሰ ኢማና።

ጳውሎሳ ቡዞ ቆፋታ

9 ኤሌሳ ያዳ ታና ቤዓ።

10 ዴማሲ ሃ ኣላሚያን ዴዒያባታ ደሲዲ፤ ታና ኣገዲ፤ ቴሴሎንቄ ካታማ ቢሰ። ቄርቄሲ ጋላቲያ ቢታ፤ ቃሲ ቲቶይ ዲልማዲያ ቢታ ቢሰ።

11 ሉቃሳ ፃላሊ ታራ ዴዒሰ። ማርቆሲ ፆሳ ኦሶን ታና ማዳናው ዳንዳዒያ ገሾ ኔራ ኤካዳ ያ።

12 ታኒ ቲኪቆሳ ኤፌሶና ካታማ ኪታሰ።

13 ኔኔ ያሺ፤ ዲርዒዳ ካታማን ካርፖሳ ማታን ኣጋዳ ዪዳ ታ ኮቲያኔ ማፃፋታ ታው ኤካዳ ያ። ኡባካ ጋልባን ፃፊቲዳ ማፃፋታ ኤኮና ዮፓ።

* 4:8 ዲሎቴላ ካላቻይ፡ ዲሎቴላ ዴዖ ገሾ ታ ኤካና ካላቻ። ዲሎቴላ ታው ካላቻ ኢሊዲ ኢሜስ ጉሱ። 4:10 ቆላ 4:14፤ ፊልሞ 24፤ 2ቆር 8:23፤ ጋላ 2:3፤ ቲቶ 1:4 4:11 ቆላ 4:14፤ ፊልሞ 24፤ ሃ.ኦ 12:12፤ 25፤ 13:13፤ 15:37-39፤ ቆላ 4:10 4:12 ሃ.ኦ 20:4፤ ኤፌ 6:21-22፤ ቆላ 4:7-8

- 14 ቢራታ ቆዳያ ኢስኪንዲሬይ ታና ዳር ቆሂሰ፤ ጎዳይ ኢያ ኦሱዋዳ ኢያው ዛራና።
- 15 ኢ ኑ ተሚርተያ ዳር ኢዳያ ጊሾ ኢያፔ ኔና ናጋ።
- 16 ኮይሮ ታ ሞቴተያ ዎዴ ኡባይ አጊዲ ቢደሶናፔ ኣቲን ኦኒካ ታና ማዲቤና። ያሳይ ሄ ባላ ኤንታው ታይቦፖ።
- 17 ሸን ታኒ ኩሜላ ከታ አይሁዴ ጊዶና አሳ ኡባሰ ማርካቲን፣ ኤንቲ ሲዓና ሜላ ጎዳይ ታ ማታን ኤቁዲ ታው ዎልቃ ኢሚሰ። ቃሲ ኮሻቲዳ ጋሞዳ ዶና ዶዪዳ ሃይቁዋፔ ታና አሸሰ።
- 18 ጎዳይ ታና ኢታ ኡባፌ አሺዲ ባ ሳሎ ካዎቴላ ሳሮን ኤፋና። ኢያው ሜሪናፔ ሜሪና ጋካናው ቦንቾይ ጊዶ። አሚንዲ።

ወርሴላ ሳርላ

- 19 ጲሪሰቁላሰ፣ አቁላሲኔ አኔሰፎራ ሶ አሳሰ ታ ሳርሉዋ ኑዳ።
- 20 ኤራሰያሲ ቆሮንቶሳ ካታማን ኣቲሰ። ዪሮፊሞሲ ሃርጌቲዳ ጊሾ ሚሊዳ ካታማን ኣጋሰ።
- 21 ባልጎይ ጌላናፔ ሲንፄ ኤሌሳዳ ያ። ኤዉቡሉሲ፣ ጲዴሲ፣ ሊኑሲ፣ ቁላዴይኔ ሃራ አማኒያ አሳቲ ኡባይ ኔና ሳሮ ሳሮ ጎሶና።
- 22 ጎዳይ ዬሱስ ኪሪሰቶሲ ኔ አያናራ ጊዶ። ያሳ ማርቴላይ ሂንቴ ኡባራ ጊዶ።

4:14 1ዓመ 1:20፤ ማክ 62:12፤ ሮሜ 2:6 4:19 ሃ.ኦ 18:2፤ 2ዓመ 1:16-17
 4:20 ሃ.ኦ 19:22፤ ሮሜ 16:23፤ ሃ.ኦ 20:4፤ 21:29

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5